



84. Nemendamót Verzlunarskóla Íslands



Árlegt Nemendamót VÍ er venju samkvæmt haldið hátíðlegt fyrsta fimmtudag febrúar-mánaðar. Þessi dagur er af Verzlingum talinn hápunktur félagslífsins ár hvert. Miklar og ríkulegar hefðir eru hafðar í heiðri þennan dag og miklar væntingar eru gerðar til hans. Algengt er að þekkir hefji daginn snemma morguns og hittist yfir morgunverði í heimahúsi áður en farið er á leiksýninguna.

Í gegnum tíðina hefur dugnaður og metnaður einkennt þær sýningar sem nemendur hafa sett upp í tengslum við Nemendamótið og svo er einnig nú. Að þessu sinni bregða þau sér til vafasamari hverfa í París um aldamótin 1900. Kvikmyndin Moulin Rouge! er fyrirmyndin og er uppsetningin unnin út frá henni. [Facebook-síða](#) sýningarinnar geymir frekari upplýsingar um uppsetninguna. Hægt er að nálgast miða á [miði.is](#).

Þegar líður á kvöldið hittast þekkir ýmist á veitingastöðum eða heimahúsum og snæða saman. Þaðan er farið í bekkjarpartí og beinir skólinn þeim tilmælum til foreldra að heimila ekki eftirlitslaus partí. Loks er haldið á dansleikinn sem haldinn er í Valsheimilinu. Húsið verður opnað klukkan 21:30 og lokað klukkan 23:30. Ballinu lýkur síðan klukkan 01:00 og frí daginn eftir. Foreldraráðið gefur 16 gjafabréf að upphæð 10.000.- kr. hvert.

Varðandi námsframvindu

Nú er vorönnin komin vel af stað og skólalald komið í eðlilegt horf. Samhliða fyrstu dögum annarinnar voru haldin endurtektarpróf fyrir þá nemendur sem misstigu sig í loka-prófunum um jólin. Stór hluti nemenda nýtti jólaleyfið vel og vann vel í þeim áföngum sem upp á vantaði. Rétt tæplega 75% úrlausna skiluðu nemendum fullnaðareinkunn í áfanganum. Þeir sem ekki náðu þurfa að endurtaka áfangann í fjarnámi, sbr. reglur um námsmat, próf og verkefni. Fyrsta

kennsluvikan í fjarnámi hófst þriðjudaginn 26. janúar og eru þeir sem enn hafa ekki skráð sig beðnir um að hafa samband við fjarnámsstjóra.

Vakin er athygli á að regla [5.3](#) um námsmat og námsframvindu mun verða felld úr gildi við lok þessa skólaárs. Áður hefur verið fjallað um þessa reglu og mögulegar afleiðingar hennar, sjá [7. tbl. Vefritsins 2. árg.](#) Framvegis munu einungis þeir áfangar sem hafa lokaeinkunn að lágmarki 5.0 skila nemendum einungum.

Réttiritun í 3. bekk

Skólinn leggur áherslu á að nemendur nái góðum tókum á réttiritun og fái stuðning til þess að bæta sig ef á þarf að halda. Nemendur á fyrsta ári, sem ekki náðu 4,5 í stafsetningu á jólaprófi, eru nú skráðir í sérstakan stafsetningaráfang í fjarnáms-umhverfinu. Þessi áfangi, ÍSLE1ST01, er nemendum að kostnaðarlausu en til þess er ætlast að nemendur sýni metnað í verki og vinni vel í áfanganum enda gefur hann

einingu. Foreldrar og forráðamenn eru hvattir til þess að ræða við börn sín um mikilvægi þess að stafsetja rétt og kosti þess að nýta þá aðstoð sem skólinn býður upp á. Auk þess að hafa aðgang að fjarnámsumhverfinu hitta nemendur kennara sinn reglulega og er þá farið nánar í reglur og æfingar. Standist nemandi ekki áfangann hefur það ekki frekari áhrif á námsframvindu hans.

Gleði- og forvarnardagur

Fyrsti miðvikudagur í febrúar verður helgaður gleði og margvíslegum fróðleik um lífið og tilveruna. Hefðbundin kennsla verður í fyrsta tíma en síðan verður skipt um takt og við taka fyrirlestrar, samræður og örnám-skeið um ýmislegt sem tengist því að vera ungur í margbreytilegu og flóknu samfélagi. Von er á góðum gestum því mörg erindin verða í höndum utanaðkomandi aðila en einnig sýnir starfsfólk skólans á sér nýjar hliðar. Það er vafalaust fróðlegt fyrir foreldra og forráðamenn að kynna sér [dag-skrána](#) og ræða við börnin sín um þá fyrirlestra sem urðu fyrir valinu og hvernig þeim líkaði, því úr mörgu er að velja.

Foreldraviðtöl

Fimmtudaginn 28. janúar var foreldrum og forráðamönnum ólöggráða nemenda boðið að koma og hitta umsjónarkennara. Afar ánægjulegt er hversu vel foreldrar mæta í þessi viðtöl og fagnar skólinn þeim áhuga sem foreldrar og forráðamenn sýna því starfi sem fram fer innan skólans. Jafnframt lýsir skólinn yfir ánægju sinni með hversu vel foreldrar og forráðamenn fylgjast með námsframvindu barna sinna. Að gefnu tilefni vil ég benda foreldrum og forráðamönnum nemenda í 5. og 6. bekk á að nemendur geta sjálfir stillt heimasvæði sitt í INNU þannig að það opni að nýju fyrir foreldraaðgang.